



Jens-Erik Kirkegaard, Siumut
Inatsisartuni ilaasortaq
/Maani

§ 37 naapertorlugu nalunaarasuartaateqarnermi namminersortunngorsaaneq pillugu apeqquut nr. 2015-168-imut akissut

Brevdato: 17-07-2015
Sags nr. 2015-116411
Dok. nr. 2015816

Asasara Jens Erik Kirkegaard,

Aallarniutigalugu apeqquutit pillugit qutsavigissavakkit.

Inatsisartut suleriaasianni § 37 naapertorlugu nalunaarasuartaateqarnermi namminersortunngorsaaneq pillugu apeqquutinik arlalinnik Naalakkersuisunut saqqummiussa qarputit. Apeqquutit uannut akisassanngorlugit innersuussutigineqarput.

Postboks 909
3900 Nuuk
Tlf.: (+299) 34 50 00
Fax: (+299) 32 52 86
E-mail: isan@nanoq.gl
www.naalakkersuisut.gl

Apeqquutinnut akissuteqarnissannut paasissutissanik Nalunaarasuartaateqarnermut Aqutsisoqarfimmuut aamma TELE-POST-imut pissarsiniarpunga.

Apeqquutit ataasiakkaat akilertinnagit, innersuussutigalugu apeqquutivit qallunaatuani kalaallisuuani oqariartaatsit assigiinngitsut marluk atorneqarnerat, paatsuunganartoqaqqunagu erseqqissaatigissavara Naalakkersuisut sulinerminni ammanerulersitsineq (liberalisering) aallaavigalugu sulimmata, sulinermilu namminersortunngorsaaneq aallaavigineqanngimmat (privatisering).

Apeqquutinnut akissuteqaatikka apeqquutivit tulleriinneri malillugit kinguliini allassimapput.

1. Naalakkersuisut qanoq pilersaaruteqarpat uku namminersortunngorsaaneq pillugit, interneti, kabelikkut silaannakkoortorlu. Tassanilu illoqarfiit sorliit namminersortut unammillerfiginiarpaat imaluunniit namminersortut illoqarfinni sorlarni unammillerusunnerlutik namminneq aalajangertassavaat?

Aallarniutigalugu ilisimatitsissutigissavara, Naalakkersuisut kissaatigimmassuk ammanerulersitsinissap suliarineqarnerata nakkutigisaalluni, taamaalillunilu sunniutissat ilisimaarineqarnissaannik qulakkiikkamik ingerlanneqassasoq, tamatumalu peqatigisaanik inuiaqatigiit aningaasaqarnikkut iluaqutigisinnaasatta pissarsiarineqarnissaannik qulakkiikkamik ammanerulersitsinerup ingerlanneqarnissaa kissaatigineqarmat. Matuma kinguliani ammanerulersitsinissamik sulissuteqarnerup killiffia allaaserineqarpoq.

2009-mi Naalakkersuisut aalajangerput, atortut ledningeqanngitsut, ilaatigut nalunaarasuartaateqarnermi internetimik atuisinnaanermut, kiisalu atortut ledningeqanngitsut atorlugit atuisinnaanermut attaveqaataasut atorlugit attaveqarsinnaanermik niueruteqarneq ammanerulersinneqassasoq. Tamatuma kingunerisaanik sullissisut nutaat sullissisup nammineerluni atortunik ledningeqanngitsunik atuisinnaanermut attaveqaatai imaluunniit ledningeqanngitsunut attaveqaatit allat, sullissisup akuersissummik pigisaqartumut sullissisumulluunniit atortut ledningeqanngitsut atorlugit atuisinnaanermut akuersissuteqartut atuisinnaanermik pisiffigisai aqqutigalugit internetikkut sullissinernik neqerooruteqarsinnaalissapput.

2014-imi suliniut "Nalunaarasuartaateqarnermi namminersortunngorsaaniissamut sinaakkutissat" (oqariartaat taamanikkut Naalackersuisuusut namminersortunngorsaaneq kalaallisut atorpaat) tunngavigalugit Naalackersuisut aalajangerput, internetikkut sullissinernut qarasaasiatigullu sullissinernut niuerfiit ammanerulersinneqarnerisigut nalunaarasuartaateqarnermi niuerfinnik ammanerulersitsinermik aallartinneqarsimasumik nangitsiniarlutik. Ammanerulersitsinissamik suliaqarneq 1. november 2014-imi aallartinneqarpoq. Taamatut aalajangiinerup kingunerisaanik sullissisut nutaat akuersissummik pigisaqartumut atugassarititaasut assinginik atugassaqaartinneqarlutik, internetikkut qarasaasiatigullu sullissinerni qinigassanut amerlasuunut atuisut kiffartuunneqarnerini unammillersinnaalerput. Attaveqaatini kabelilersukkani ledningeqanngitsunilu unammillertoqarsinnaavoq. Kisiannili attaveqaatit kabelilersukkat Namminersorlutik Oqartussat kisermaassisinnaatitaanerata aammalu TELE-POST-imut akuersissutit ataaniiginnassapput. Nalunaarasuartaateqarnermi attaveqaatit ammanerulersinneqarnissaannik Naalackersuisut aalajangersimasunik pilersaaruteqanngillat. Taamaattumik sullissisunngortussat nutaat, attaveqaatinik kabelilersukkanik atuinissamik kissaateqartut TELE-POST-ip attaveqaataanik ataatsimut atuisinnaanissamik pisisariaqartassapput.

Mobilinut telefoniinnarnullu attaveqaatini nalunaarasuartaatitigut sullissinernik ammanerulersitsinissaq inuiaqatigiinnut iluaqutaassanersoq pillugu 2016-imi aammalu nalunaarasuartaatitigut sullissinerit sinnerinik 2018-imi misissuinissamik Naalackersuisut pilersaaruteqarput. Tassani inuiaqatigiit aningaasaqarneranni sunniutissanik misissueqqissaartoqassaaq, ammanerulersitsisoqassappat tamanna sioqqullugu ammanerulersitsinermi iluaqutissanik ajoqutissanillu paasiniaaffiusussamik.

Sullissisut nutaat nalunaarasuartaatitigut kiffartuussinerminnik sumiiffinni, kiffartuussinissamut niuernikkut tunngavissaqarfiusuni neqerooruteqartassasut Naalackersuisut naatsorsuutigaat. Nalunaarasuartaatitigut sullissinerit ilaat, soorlu ADSL aamma telefoniinnarnut attaveqaatit sumiiffinni killilinni, sullitatigut aningaasartuutininut matussutaasinnaasunut naammattunik tunngavissaqarfiusuni neqeroorutigineqarsinnaassapput. Mobilinut attaveqaatini sullissinerit ammanerulersinneqassappata, illoqarfinnut nunaqarfinnullu tamanut sullissinissaq naatsorsuutigineqarpoq, sullitat nunatta iluani angalanerminni mobiltelefoniminnik nassarsinnaanissaat unammilleqatigiinnermut tunngavissatut aalajangiisuunissaa naatsorsuutigineqarmat. Aamma misissueqqissaarnermut atatillugu sullissisup nuna tamakkerlugu matussusiisinnaanissaa piumasaqaatit aalajangersarneqassanersoq eqqarsaatigineqassaaq. Taamatut naliliineq mobilinut telefoniinnarnullu attaveqaatini sullissinerit ammanerulersinneqarnissaannik aalajangiisinnaanermut piareersaataasunut ilaatinneqassaaq.

2. Ilumoorpa telekkut attaveqaatit Kalaallit Nunaanni imatut aaqqissuusassaaq, internetikkut attaveqaatit (adsl il.il.) mobilip isertitaaniit taperneqartartut, pissutaalluni interneti amigartoorutaalluni ingerlammat?

TELE-POST ilisimatitsivoq, ADLS-imut amigartooruteqartoqartoq, tamatumalu peqatigisaanik mobilinut attaveqaatinik niueruteqarneq sinneqartoofiusoq aningaasartuutininik tamanik agguasarnermik taaneqartartoq tunngavigalugu suliffeqarfiup iluani naatsorsukkat takutikkaat, taamaattumillu tamanna tunngavigalugu akissut aappiuvoq.

Tamatuma saniatigut ilisimatitsissutigisinnaavara, ammanerulersitsiniarnermut pioreersumut peqatigitillugu akuersissummik pigisaqartup naatsorsuutit immikkoortunngorlugit suliarisassagai Naalackersuisunit aalajangerneqarsimammat. Tassalu TELE-POST-ip niuerfimmini immikkoortut immikkut ittumik naatsorsuusiortassavai, taakkunungalugu attaveqaatit ilaapput. Aamma TELE-POST-ip suliaani taperseeqatigiissitsisoqartarpat tamanna aamma paasiuminartunngortinneqassaaq. Ammanerulersitsisoqaralarpat

taamaattoqanngikkaluarpalluunniit tamanna oqartussaasunut, suliassaqarfimmut aammalu nalunaarasuartaatitigut attaveqaatinut ataatsimut pigisatsinnut ineriartortitsinermut soqutiginnittunut pingaaruteqarpoq.

3. Apeqqut 2-mut akissut aappiuppat, taava Naalackersuisut ima ilisimappat, internetimik niuffaffik taperneqarnissaminik mobilimik unammillerfiusumiit pisariaqartitsisoq. Imaalluni nioqqutissaq amigartoorutaasoq namminersortunngorsassallugu aalajangersimallutik?

Aap, internetikkut sullissineq ammanerulersinneqarnikuuvoq, aammalu TELE-POST-imi internetikkut sullissinerit mobilinullu attaveqaatitigut sullissinerit akornanni taperseeqatigiissitsisoqarnera ilimanarpoq. Apeqqut 1-ip akissutaani ammanerulersitsinerit naammassineqarsimasut sukumiinerusumik takuneqarsinnaapput.

4. Apeqqut 2-mut akissut aappiuppat Naalackersuisut sukumiisumik ullutsinnut pissutsinik naapertuuttumik misissueqqaarsimanerlutik innuttaasunut Telepost Greenlandimullu sunniutissai pillugit, internet namminersortunngorsarnerani, kiisalu kingusinnerusukkut mobilikkut attaveqaatit namminersortunngorsarnerani, ima isumaqassappat mobilimik atuinermit isertitaqarsinnaajunnaarnera, internetimut tapiisarnerit ingerlassinnaajunnaarlugit? Ima kinguneqarsinnaangila internet akisoreertigisoq, akitsorujunnerusinnaasoq, sualummik illoqarfinnut minnerusunut avinngarusimasunullu?

Ilaatigut 2014-imi ammanerulersitsinermut nutaajunerusumut atatillugu allakkiaq "Nalunaarasuartaateqarnermi namminersortunngorsaanissamut sinaakkutissat" suliarineqarpoq, tassanilu taperseeqatigiissitsisarnermi ajornartorsiutaasinnaasut kalluarneqarput, aammattaaq mobilinut attaveqaatinik ammanerulersitsinissamik sulissutiginninnermut atatillugu. Mobilinut attaveqaatini sullissinerit suli aalajangiiffigineqanngillat, taamatullu aalajangiisoqassappat, tamanna pinnginnerani inuiaqatigiit aningaasaqarnerannut sunniutissanik misissueqqissaartoqassaaq.

Mobilinut attaveqaatini sullissinerit ammanerulersitsiniarnermut atatillugu akinik nalimmassaaqqittoqassanersoq oqallisigineqarsimavoq, tassanilu nalunaarasuartaateqarnermi sullissinerit ataasiakkaat nalunaarasuartaateqarnermi sullissinernik tunisassiornermut aningaasartuutit naapertorlugit akinik aalajangersaasoqarpoq. Taamatut taperseeqatigiissitsisoqarpiartarnersoq, imaluunniit akit tamarmik sullissinernut pineqartunut aningaasartuutininik tamakkiisumik tunngaveqarnerisut tamakkiisumik ilisimangilarput.

Internetimut akit qaffannissaat, kiisalu mobiltelefoninut akit apparnissaat annilaangassutigineqarpoq. Tamannali pinaviangilaq. Taperseeqatigiissitsisoqartarsimappat ikaarsaarnermut najoqqutassamik, internetimut akit qaffanginnissaannut qulakkeerisussamik ineriartortitsisoqassaaq. Ikaarsaarnermut najoqqutassiap aatsaat ullormi oqimaaqatigiissitseqqinnerup akinik qaffasinnerusunik kinguneqartussaajunnaarfiani atorunnaarnissaa siunnersuutigineqarpoq.

Siunissaq eqqarsaatigalugu aningaasartuutiviusut tunngavigalugit akeqartitsilernissaq kissaatigaarput, tamanna akinut taperseeqatigiissitsinermik tunngaveqartunut naleqqjullugu unammilleqatigiinnermik pitsaanerulersitsisussaammat, kisiannili internetimut sullissinernulluunniit akit qaffatsinneqassanngillat.

5. Apeqqut 2-mut akissut aappiuppat, naatsorsuutigineqartariaqassanerluni, attaveqaatitigut unammillerfiusoq namminersortuuffimmi interneti (adsl il.il.), mobilikkut attaveqaatit isertitaaniit taperneqarsinnaajunnaarneri, akillu akiviusut atorineqartussanngorlutik, taava inuiaqatigiinnut, taamaalilluni innuttaasunut internetillu mobilillu akiannut qanoq kinguneqassava tamanna?

Ammanerulersitsinissamik sulissutiginninnerup attanneqarsinnaasumik ingerlanneqarnissaa, taamaalillunilu sullitanut akornutaasumik akit qaffariataanginnissaat Naalakkersuisunut pingaaruteqarpoq. Ammanerulersitsinissamik sulissutiginnineq ataatsimut isigalugu inuiaqatigiinnut kalaallinut iluaqutaassaaq. Taamaattumik 2016-imi aamma 2018-imi ammanerulersitsinerit pinnginnerini inuiaqatigiinni aningaasaqarnikkut sunniutissanik misissuinerimik, ammanerulersitsinerimi iluaqutissanik ajoqutissanillu paasisaqarfiusumik suliaqartoqassaaq.

Ullumikkut niuerfiit akuersissummik tunngaveqarluni niuerfimmuut aamma niuerfinnut ammanerulersinneqarsimasunut agguagaapput. Assersuutigalugu ullumikkut TELE-POST Kalaallit Nunaanni sumiiffinnut assigiinngitsunut sullissinernut assigiinngitsunut akit assigiinngitsut atorlugit internetikkut sullissinernik neqerooruteqarpoq.

Sullissinerup qaffasissusaa atorineqartoq aqqutigalugu TELE-POST-ip akuersissutip iluani nalunaarasuartaatitigut sullissineranut akit piimasaqaatillu Naalakkersuisunit akuerineqartarnissaat qulakkeerneqarpoq.

Mobilinut telefoniinnarnullu attaveqaatinik 2016-imi ammanerulersitsisoqassappat, tamatumunnga atatillugu nalunaarasuartaatitigut sullissinermi ammanerulersinneqartumi ataatsimi amerlanerusuniluunniit, niuerfinni niuernerimik tunngaveqarluni sullissinerup qaffasissusaannik kissaatigineqartumik pilersuiffiusinnaangitsutut naatsorsuutigineqartumik pilersuisussaataitaalluni tuniniagaqartussamik ataatsimik amerlanerusunilluunniit Naalakkersuisut toqqaassapput. Pilersuisussaataitaalluni tuniniagaqartussamik toqqaanermut atatillugu Naalakkersuisut pilersuisussaataitaasup sullissinermut atortuinut atuuffiinullu, kiisalu nunami sumiiffinnut pilersuisussaataitaaffiusunut maleruagassamik aalajangersaassapput.

Pilersuisussaataitaalluni tuniniaasussatut toqarneqartoq pilersuisussaataitanerup kingunerisaanik amigartoorutini uppersarneqarsimasut tamaasa matussusertissallugit pisinnaataitaaffeqassaaq. Nalunaarasuartaateqarnermik suliassaqarfimmiit pilersuisussaataitanermi amigartoorutaasinnaasut aningaasalersorneqassapput. Tamatumunnga aningaasalersuinissamut ungasianiit attaveqaqatigiinnermik atuinerimut akitsuummik immikkut ittumik akiliisitsisoqartassaaq. Akitsuut sullissisunut tamanut ungasianiit attaveqaqatigiinnermik atuinerat tunngavigalugu nammaqatigiiffiusumik akilersinneqartassaaq.

6. Namminersorluni inuussutissarsiortoq Nuummiinnaq unammillersinnaava piumaguni, taavalu inuiaqatigiit pigisaat Telepost Greenland A/S nunarput tamakkerlugu kiffartuussisussaataitaalluni, tassalu avannaani Qanaamiit nunaqarfii ilanngullugit, kujataani Nanortalik nunaqarfiilu tikillugit, kiisalu nunatta kangiani illoqarfiit nunaqarfiillu?

Sullissisut nutaat interneteqarnermi Kalaallit Nunaat tamakkerlugu sullissinissamut pisussaaffeqanngillat, taamaattumillu sumiiffinnik aningaasaqarnikkut pilerinartunik toqqartuisinnaapput, kisiannili TELE-POST Kalaallit Nunaat tamakkerlugu pilersuinissamut pisussaaffeqarpoq. Kiisalu apeqqut 5-imut, pilersuisussaataitaallutik tuniniaasut amigartoorutiminnut, ungasianiit attaveqaqatigiinnermi amerlasuukkaaraluni tuniniaanermut akitsuutit aqqutigalugit nalunaarasuartaateqarnermik tuniniaasunit tamanit aningasaliiffigineqarsinnaatitaanerannut tunngasumut innersuussissaanga.

Tamatuma saniatigut erseqqissaatigineqassaaq, ilaatigut illoqarfinni immap naqqatigut kabeleqarfiusuni bredbåndimut attaveqaatinik sukkasuunik piumasaqarneq attaveqaatit pitsaannerusumik atornerarnerinik nassataqarmat, tamannalu aamma aningaasartuutit appasinnerunerinik nassataqarpoq. Tamanna ineriartorneruvoq atugaalersoq pitsaasoq. Tamanna illoqarfinni, immap naqqatigut kabelimut toqqaannartumik atuiffiusuni atuisunnarnut iluaqutaginnartussaangilaq. Atuisunulli immap naqqatigut kabelinik sianerermut interneternermulluunniit tamanut iluaqutaasussaavoq.

7. Namminersortunngorsaaneq telekkut attaveqaatinik piviusunngorpat/piviusunngussappat akit qanoq inissinneqassappat, tassa illoqarfinni unammiffiusuni kiisalu illoqarfinni nunaqarfinnilu unammillerfiunngitsuni?

Nalunaarasuartaateqarnermi attaveqaqatigiinnerup nunarput ataqaatigiissittussaavaa, taamaattumillu kikkut tamarmik nalunaarasuartaateqarnermi attaveqaqatigiinnermik pitsaasumik qulakkeerunneqartussaapput. Tamatuma saniatigut nuna tamakkerlugu ilaatigut pisortani sullissiviit nutarternerisigut ineriartortinnerisigullu digitaliseeriiffiusinnaasut tapersearniarlugu, nalunaarasuartaateqarnermi attaveqaqatigiinnerup qaffasissuunissaa pingaaruteqarpoq. Tamanna pilersuisussaataitaallutik tuniniagaqartussanik toqqaanikkut, aammalu pilersuisussaataitaanerup Naalakkersuisunit aalajangersarneqarneratigut, nalunaarasuartaateqarnermilu tuniniagaqartut nammaqatigiillutik aningaasalersuinerisigut pisinnaavoq. Tamanna pillugu apeqqut 5-imut akissut takuuk.

Atuisunut nuannaarutaasumik sumiiffinni unammillernissamut tunngavissaqartuni nalunaarasuartaateqarnermut ingerlatseqatigiiffiit atuisut pillugit pilerngunnerisa malitsigisaanik tunisassiat neqeroorutigineqartut amerlisussaapput, aammalu akit ingerlaavartumik unammillerfiusussaallutik.

8. Naalakkersuisut qinnuigissavakka ilisimateqqullunga Telepost Greenland A/S ukunani nioqqutini iluanaaruteqarnersoq, adsl aamma mpls atorlugit internetimut attaveqaatit, ukunani sumiiffinni illoqarfiit immap naqqatigut kabelikkut attavillit, illoqarfiit nunaqarfiillu sakkortusaaviit atorlugit attavillit kiisalu illoqarfiit satellit atorlugu attavillit.

TELE-POST-imit ilisimatitsissutigineqarpoq, naatsorsuusiortarnermut nalunaarutip atunnerata aammalu TELE-POST-imi naatsorsuutit paasiuminarnerulersinneqarnissaannik suliaqarnerup kingunerisaanik ingerlatseqatigiiffiup naatsorsuutai amerlasuukkaaraluni niuernermit aammalu ataasiakkaaraluni niuernermit avitaasut. Ataasiakkaaraluni niuernerq ataatsimut isigalugu amerlasuukkaaraluni niuernermit ingerlalluarneruvoq. Ataasiakkaaraluni niuernermit immap naqqatigut kabeli aamma radiokædeqarfiit sinneqartoofiupput, kiisalu qaammataasamik atuiffiusut amigartooruteqarfiullutik.

9. Naalakkersuisut ullutsinnut pissutsinut naapertuuttumik misissuinikuunerlutik, telekkut attaveqaatinik unammilleqatigiinneq pillugu sussanersoq tikkuussisumik, namminersortunngorsaaneq piviusunngoreerpat/piviusunngussappat?

Ammanerulersitsinissamik sulissutiginninnerup annertuseqqinneqarnissaa eqqarsaatigalugu sunniutissanik sulii misissueqqissaartoqanngilaq. Naalakkersuisut ammanerulersitsiniaannarlutik ammanerulersitsinissamik aalajangiiniangillat. Aatsaat ammanerulersitsineq Kalaallit Nunaannut tamarmiusumut iluaqutaassappat ammanerulersitsisoqassaaq. Taamaattumik ammanerulersitsinissamik sulissutiginninnerup aalajangiunneqannginnerani inuiaqatigiit aningaasaqarnerannut sunniutissat, iluaqutissanik ajoqutissanillu saqqummiussiffiusut misissuiffigineqassapput. Misissueqqissaarneq taanna sulii pinngilaq.

- 10. Apeqqut 9-mut akissut aappiuppat, taava sunniutissai qanoq ilimagineqarpat, tassani ilanngullugu illoqarfiit nunaqarfiillu akikinnermik internetimut attaveqaateqalissanersut?**

Apeqqut akineqanngilaq, apeqqut 9-mut akissut naaggaammat.

- 11. Namminersortunngorsaanermut Naalackersuisut politikkerivaat attaveqaatitigut atortut Telepost Greenland A/S-p pigissagai ingerlallugillu, taava attaveqaatit/nioqqutissat attuumassuteqartut, soorlu adsl mpls-ilu namminersortunngorsarneqassasut. Naalackersuisut misissuinikuunerlutik taamannak aaqqissuussinerup kingunissai telekkut attaveqaatit nioqquteqarfiani, ilanngullugu illoqarfiit anginerit, illoqarfiit minnerit kiisalu nunaqarfiit avinngarusimasullu telekkut attaveqaatitigut akii, aningaasaliisarnissamullu piumasaqaatit?**

Internetikkut sullissineq ammanerulersinneqarsimalereerpoq.

"Nalunaarasuartaateqarnermi namminersortunngorsaanissamut sinaakkutissat"-ni, maleruagassiat, Kalaallit Nunaat tamakkerlugu pilersuinerup, aammattaaq niuerfimmi ammanerusunngorsakkami, pitsaasuunerata ingerlaannarnissaa anguniarlugu, kiisalu amigartoorutaasut qanoq ililluni aningaasalersorneqarsinnaanissaannut inissinneqartussat nassuiarneqarput. Kiisalu pilersuisussaataitanermi amigartoorutaasinnaasut internetimut akit qaffatsinngikkaluarlugit qanoq iliorluni isumagineqarsinnaanersut nassuiaatigineqarput. Aammattaaq apeqqut 9-mut, annertunerusumik ammanerulersitsinissamut atatillugu misissueqqissaarnissamut tunngasumut akissuteqaat takuuk.

- 12. Ineqarnermut Attaveqarnermullu Naalackersuisup Knud Kristiansen-ip apriliimi 2015 KNR tv-kkut Qulaarpaami neriorsuutigaa mobilikkut attaveqaatit namminersortunngorsannginnerini misissuisoqaaqqaassasoq. Tamanna suliaq aallartereernerluni?**

- a) Taamaassappat qaqugu
naammassissava?
b) Suliaq aallartereersimanngippat, qaqugu
aallartissava taavalu qaqugu naammassinissaa naatsorsuutaava?

Misissueqqissaarneq suli aallartinneqanngilaq.

- 13. Apeqqut 9-mut akissut naamiuppat, qanoq ilillutik Naalackersuisut ilisimavaat akit adsl aammalu mpls internetimut apparnissaat, ukunani illoqarfiit immap naqqatigut attavillit, sakkortusaavikkut attavillit kiisalu satellittikkut attavillit pillugit?**

Inussiarnersumik kaammattorpakkit apeqqut 9-mut aamma 11-mut akissutit takoqqullugit.

- 14. Internetikkut mobilikkullu attaveqaatit namminersortunngortinneqassappata, Naalackersuisut misissuinikuunerlutik qanoq ukununga sunniuteqassanersoq: aningaasanik attartornikkut Telepost Greenland-ip aningaasaliinissaanut, pilersaarutaanullu Aasiaat tikillugu immap naqqatigut attaveqalernissaq illoqarfinnilu aalajangersimasuni sakkortusaavinnik nutarterinissamut annertusaanissamullu?**

Ammanerulersitsinissamik sulissutiginninnerup TELE-POST-ip pilersaarutaasunut aningaasaliinissamut atatillugu taarsigassarsinissamut periarfissaannut sunniutissat misissuiffigineqarsimanngillat, kisiannili ammanerulersitsinissamik sulissutiginninnerup sunniuteqarnissaa naatsorsuutigineqanngilaq. TELE-POST Namminersorlutik Oqartussat 100%-imik pigisaraat, ingerlatseqatigiiffiuorlu patajaassuseqarluortoq,

attaveqarnermi kisermaassinermik pigisaqaannartussaq. Kiisalu TELE-POST ingerlatseqatigiiffittut pilersuisussaataalluni tuniniagaqartutut toqqarneqassaguni, aammalu suliaassanullu pisussaaffilerneqarnermini amigartooruteqassaguni taarsiivigineqartussaavoq, taamaallunilu unammilleqatigiinnermi naligitaaalersussaavoq, amigartoorutit nalunaarasuartaateqarnermik suliaasaqarfiit nammaqatigiillutik aningaasalersortussaammatigik. Oqaatigineqareersutut annertunerusumik ammanerulersitsinissamik sulissutiginninnermut atatillugu misissueqqissaartoqassaaq.

15. Apeqqut 14-mut akissut aappiuppat, aningaasanik atukkiisartut atukkiuumassusaanut qanoq sunniuteqassava?

- a. Ilaatigut misissorneqarsimanerluni ukiut 5-10 siumut aningaasaliiffissanik aserfallatsaaliinissanillu ilimagineqarsinnaasut Telepost Greenlandip pisariaqartissagaa,
- b. aningaasaliisariaqarnerit makku kingunerisaanik internetimik atuinerup annertusiartupiloorneranik, <http://aqa.gl/ki/Manna-pillugu/Presserum/Paasissutissat/2015/Brug-af-Internet-vokser-kraftigt>,
- c. atuisut atueriaasiata allanngoriartorneranik, taamatuttaaq teknologi Telepost Greenlandip atortuutaani pisoqalisooq imaluunniit atortut aserfallattut taarsertariaqartut.

Apeqqut 14-imut akissut naaggamik akineqarmat apeqqut akineqanngilaq.

16. Apeqqut 14-mut akissut naamiuppat, tamanna aningaasanik atorniartarfiit aningaasaleerusussusaannut annertusaanissamut pilersaarutaasunut sunniuteqassava?

Inussiarnersumik qinnuigaakkat apeqqut 14-imut akissut takoqqullugu.

- 17. Assersuutigalugu; telekkut attaveqaatit tamakkiisumik namminersortunngorsarneqarpata, Telepost Greenlandip iluanaarutaa millissavaa?**
- a. Taamaassappat qanoq aningaasanut inatsimmi Telepost Greenlandip iluanaarutaaniit agguagarsiaaneersut matussuserneqartassappat?
 - b. Qanoq siunissami aningaasaliinerit annertusaanermut, aserfallatsaaliinermut soorluttaaq teknologi pisoqalisumut taarsersuinerit aningaasalersorneqartassappat?

Oqaatigineqartutut 2016-imi aamma 2018-imi ammanerulersitsisoqassappat, tamanna sioqqullugu inuiaqatigiit aningaasaqarnerannut misissoqqissaagassat, ammanerulersitsinerup kingunerinik saqqummiussiviusussat suliarineqassapput, taakkunungalulu aalajangiinerup nunap karsianut qanoq sunniuteqarnissaa ilaatinneqarpoq.

- 18. Ilumoorpa maannakkut internetikkut mobilikkullu attaveqaatit namminersortunngorsarneqarnerat toqqammaveqartoq nalunaarusiami ukiut 15-it missaani pisoqaassuseqartumi? Imaappoq immap naqqatigut kabelikkut Kalaallit Nunaat attaveqaateqanngikkallarmat, netflix-eqanngikkallarmat, 4G-qanngikkallarmat taamatuttaaq kiffartuussinerit pissutsillu ilaatinneqarsimasinnaanngitsut taamani taava misissuinermi ilaatinneqanngitsut?**

Mobilinut attaveqaatinik ammanerulersitsinissaq sulii aalajangiiffigineqanngilaq, tassanilu inuiaqatigiit aningaasaqarnerinut sunniutissanik misissueqqissaarneq apeqqutaassaaq. Kiisalu taamatut aalajangiineq pillugu Aningaasaqarnermut Akileraartarnermullu

Ataatsimiititaliaq ilisimatinneqassaaq. Interneteqarnermi ammanerulersitsinissamut aalajangiussaareersut, nalunaarasuartaateqarnermut peqqussummut 2006-imeersumut piareersaatini, siunissamut ungasissumut suliniuteqarnikkut anguniagassatut allassimareerput, tassanilu nalunaarusiat misissueqqissaarnerillu, nalunaarasuartaateqarnermut peqqussutip 2006-imi aalajangiiffigineqarnissaa sioqqullugu ingerlanneqartut tunngavigineqarput.

Inussiarnersumik inuulluaqqusillunga

Knud Kristiansen